

櫟下老人手輯

字觸

賴古堂藏板

序

文生于字，生于畫，成數立而道寓

焉。吾獨怪天下之詳文而畧于字也。伍

鬚什姨村氓踵繆而弄麀，伏獵之譌當

時同一齒冷。夫既中書而右相矣，六書

之喋，亦奚為乎其他三刀之益。山絲



之幽草付之苻川旁百川之順則又以為
推測小數而不足論夫二數于道不可
也二字于文使人讀書不求識字而又可
乎斯道于世抑何其荒隊不復也吾友
周櫟園先生多才嗜古而工字學予嘗
叩以東方曼倩謝潤天之術櫟園笑曰

易耳其妙在觸者幾也觸圓而神幾
易以貢子聞泮然悟畫與數之說退而
以己意引伸之未嘗不合也及是再過
長干而櫟園字觸成來索言曰此昔人
零碎本子也櫟園著作自詩歌古文以
逮經史百家編摩論定之書盈笥累架

餘而溢于聲音點畫之字猶爾雅之註
蟲魚易之廣卦而旁及于果蓏黔喙之
屬也其碎之宜抑予將由櫟園之所謂
觸者而進之夫謂書契之興蓋中古耳
吾聞昔人之書法矣取諸鬪蛇取諸舞
劍取諸擔夫爭道結繩之視數者豈有

異乎且安知其用之不更捷于蝌文鳥
篆也字固在蒼皇以前也如以為文與
畫也而道不存庖犧氏之作易也一畫
而乾再畫而坤雷風水火以次列焉天
地道之所自出也而不越乎點畫一再
之間况于人乎况于鬼神乎古今明道

之聖如義皇者亦可以止矣且天下之
故有自然有不知其所以然其自然者
幾隱而義著吾以歸之文不知所以然
者朕渺而微竒吾以歸之數文存而天
地人物具其中數存而風謠圖緯機祥
夢卜元會運世在其中皆道也道自然

而其觸而變也乃莫測所以然自然故
神莫測其所以然故其觸化有不知而
強觸者罌壘之撰病于妄隋維之改病
于支中舍之諱病于愚土皮之詰病于
固即聲音點畫間已牴牾繆戾之不勝
况欲其通變不窮益人神智乎微而中

襍而不越說文而後言字學者吾必以
是書繼為唐相抑畧之誤小吏正之宋
使口耳王之對至以上國之卿貽譏伴
使讀書識字重同不在文下請為標園
氏復曰零碎本子若字觸者可也

康熙六年歲次丁未孟春之吉盱江年

同學弟徐芳拜手書于情話軒



字觸序

六書之學莫妙於會意會意之妙在
合衆體以成文如止戈爲武力田爲
男背私爲公一勺爲与十口爲古大
可爲奇之類此二體合也盥字从水
从皿指事从白而取之會意塵字从
广从卑指事从土而分之會意亟字

从二象天地形从人从口从又謂人
在天地間口謀之手爲之時不可失
會意爨字从同象羸形从冫象突形
一人兩手安羸於其上而又一人兩
手析薪投之火中會意則合三體以
至六體其字甚多不可勝數夫小篆
變自李斯說文昉於許慎當時遂有

此說已開後人離合相字之門矣故
蔡邕之黃絹幼婦孔融之漁父屈節
魏武之人一口梁武之与上人王濬
之三刀丁固之十八公皆從此出至
謝石胡弘之徒直以此技爲占卜則
變化其意而用之者焉櫟園周先生
通才博學無所不能間嘗取謝石之

法爲人斷疑徃徃奇中因攆撫古今
字說之有據者萃爲一編曰字觸觸
者隨意所觸引而伸之不必其字本
義也如劉字之爲卯金刀吳字之爲
天承口出字之爲山上山皆非其字
本義古人豈不識字哉仁智異見擬
議無方此會意之所以妙也先生是

書搜括羣籍包羅衆理大有功于後
學或者不察以爲說部中之一種甚
且以爲術數家言豈知先生者乎予
故推其所自蓋出於保氏六書即古
司徒以鄉三物教萬民之一端也觀
者苟因是書進而求之許氏說文大
小二篆皆可以意相通矣予老且鈍

無所知識。然磨礪字學。將三十年。其於六書。亦略知梗槩。故先生命予序。予不敢以不文辭。康熙六年丁未初秋。僉山方文撰。



字觸凡例

廋部

字以觸名。本取點畫無貴聲詩。然支干數目盡。諧雅章藥物卦名咸歸韻什。至於離合之篇。專主分析其字。託之隱語。詩教似支。而敷義昭融。製辭雋上。如諷蘇李之吟。奚啻齊梁之句。卽不更以點畫相繩。亦宛然正葩嗣響也。今人不但不能佳。並不知此體矣。因類及隱語。作廋部第一。

外部

外之爲義與觸無殊。因一字而離合。連數字爲引伸。全編大旨似此。爲歸宜名之內。曷云外焉。然假借起於無端。會意半由旁見。按之六書。不協正義。惟取天機之妙。合兼因時。會以變通。庖羲畫象於此。可該公明。前知未之。或越則內無可稱。而外或可名也。作外部第二。

晰部

晰以剖析爲名。不外離合。近是然。度辭多出有

意。晰字多從無心。度以數字輻輳。一字晰以一字分拆數字也。若乃題合書門。雖同有意而無數字之繁。子系。棄屐不止一字。而非有意之例。細類不齊。幾微有別。讀者得其意思所在。要無失乎其爲晰也。作晰部第三。

幾部

度外。晰皆以字爲別。既有點畫之形。卽有錯綜之義。若乃無字形而有朕兆。斯謂之幾。因以分部。雙魚集屋。王肅別有奇。占少女。微風管輅。卽

字解
憑望氣。未有窺蟲書之原始。探蒼頡之根宗。觀象以知文。感幽以著說。而吉凶禍福。居然不爽。者。易曰。知幾其神。通其道者。無字中。忽示以字矣。作幾部第四。

諧部

莊述齊。諧惟取志怪。晏名諷諫。半襍詼諧。斯雖劈字以成章。豈非滑稽之巧笑。優俳所一視者乎。然方言俚俗。而辭文風刺。刻深而旨雅。絜之離合之篇。固有正變之異。揆之風雅之則。亦僅詩曲之分。巧成杼軸。取辦俄頃。可以發人慧。可以廣人思。深其義類。要亦推測之佐也。豈獨風趣絕人而已哉。作諧部第五。


說部

觀乎說。幾乎六書之義焉。淳于絕纓之後。進以莊言。長卿侈麗之餘。歸之正。則是亦曲終雅奏也。故受之以說部。終焉。然問字不啻萬千。說文亦多紛贖。他若安石之陳編。則天之創體。如斯等類。不可勝收。而僅有取乎此者。非離合之義。

弗載焉耳。

順治丁亥嘉平望後二日櫟下老人識于樵川

之詩話樓



字觸

卷之一

櫟下老人

輯

青溪蘿隱

較

廋部

越絕書

越絕書云。以去爲姓。得衣乃成。厥名有米。覆之
以庚。禹來東征。死葬其鄉。不直自斥。託類自明。
又文屬詞定。自於邦賢。以口爲姓。承之以天。楚
相屈原。與之同名。
楊用修曰。去得衣。乃袁字。米覆庚。乃康字。禹葬會稽。是會

稽人袁康也。其不直自斥。託類自明。厥旨昭然。欲後人知也。文屬詞定。自於邦賢。言共著非康一人也。以口承天。吳宇。屈原同名。平字。與康同著此書者。乃吳平也。或曰二人何時人也。曰東漢也。東漢之末。文人好為隱語。黃絹其著者也。孔融隱其姓名於離合詩。魏伯陽隱其姓於參同契。融與伯陽俱漢末時人。故字稍同。則茲書之著為同時何疑焉。

參同契

參同契後序云。鄙會鄙夫。幽谷朽生。委時去害。依託丘山。循遊寥廓。與鬼為鄰。百世一下。遨遊人間。湯遭厄際。水旱隔屏。隱會稽。魏伯陽五字。古魏字作魏。故云丘山。

藁砧

古詩云。藁砧今何在。山上復重山。何時大刀頭。破鏡飛上天。藁砧謂砧夫也。山上山出也。大刀頭鑲還也。破鏡上天。半月形。月初也。

魯國孔文舉

孔融離合詩云。漁父屈節。水潛匿方。與時進止。出行施張。呂公釣磯。益口涓傍。九域有聖。無土不王。好是正直。女回於匡。海內有截。隼逝鷹揚。六翮將奮。羽儀未彰。蛇龍之蟄。俾也可忘。玳璇

隱曜美玉韜光。無名無譽。放言深藏。按轡安行。誰謂路長。

思楊容姬難堪

晉潘岳離合詩曰。佃漁始化。人民穴處。意守醇朴。音應律呂。桑梓被源。卉木在野。錫鑾未設。金石弗舉。害咎蠲清。吉德流普。谿谷可安。奚作棟宇。嫣然以熹。焉懼外侮。熙神委命。已求多祐。嘆彼季末。口出擇語。誰能墨誠。言喪厥所。壟畝之諺。龍潛巖阻。尠義崇亂。少長失敘。

思玄

紫微王夫人贊許長史慎。蕭邈真身。內鏡外和。曾參出田。丹心同舟。素系三遷。來庇方頭。下四句離合思玄字。思玄。長史字也。真誥

悲客他方

宋孝武離合詩云。霏雲起兮汎濫。雨靄昏而不消。意氣悄以無樂。音塵寂而莫交。守邊境以臨敵。寸心厲於戎昭。閣盈圖記。門滿賓僚。仲秋始戒。中園初凋。池育秋蓮。水滅寒漂。旨歸塗以易

感日月逝而難要。分中心而誰寄。人懷念而必
謠。六帖

謝惠連離合詩曰。放棹遵遙塗。方與情人別。嘯
歌亦何言。肅爾凌霜節。

又曰。夫人皆薄離。二友獨懷古。思篤子衿詩。山
田何足苦。

別

謝靈運離合詩曰。古人怨信次。十日眇未央。加
我懷繾綣。口詠情亦傷。劇哉歸遊客。處子勿相
忘。

信

賀道慶離合詩曰。促席宴閒夜。足歡不覺疲。詠
歌無餘願。永言終在斯。

娛

齊石道慧離合詩曰。好仇華良夜。子歡我亦欣。
昊穹出明月。一坐感良辰。

寵

梁元帝離合詩曰。沈寥雲物淨。水木備春光。龕定方無達。合浦不難航。

何敬容

梁蕭巡離合詩贈尚書令何敬容曰。伎能本無取。枝葉復單貧。柯條謬承日。木石豈知晨。狗馬誠能盡。犬羊非易馴。效顰既不似。學步孰能真。寔由紊朝典。是日蠹彝倫。俗化於茲鄙。人途自此分。

閑居有樂

陳沈炯離合詩贈江藻曰。開門枕芳野。井上發紅桃。林中藤蔦秀。木末風雲高。堂室何寥廓。志士隱蓬蒿。故知雲外賞。文酒易陶陶。朋友足諧晤。又此盛詩騷。朗月同攜手。良景共含毫。樂巴有妙術。言是神仙曹。百年肆偃仰。一理詎相勞。

王安石

王安石柄國時。有題相國寺壁云。終歲十二月也青字

荒蕪艸田也湖浦焦水去也貧女戴笠安落柘字

條石阿儂吳言也去家京洛國遙心驚寇盜賊

也來攻剽合之為青苗法安石誤國賊民也

白水真人

莽篡位忌惡劉氏以錢文有金刀故改為貨泉

或以貨泉字文為白水真人白水光武所居鄉

名也漢光武本紀

董卓呂布

董卓時有謠言曰千里草何青青十日卜猶不

生又有道士書布為呂字以示卓卓不悟竟被

殺本傳

曹丕

日載東曹絕火光漢不橫一丕聖明聰魏四百

之外易姓而王天下歸功致太平此魏之姓諱

著見圖識也

炎

司馬懿拜司空日夜有人扣門請見自稱白虎

使者皆衣白衣懷中探一物內懿手中戒曰兩

世慎勿開墓中絕言訖不見懿曰此或數也遂

開視之。乃一金龍子。長三四寸。背上有銘云。父子從我受重火。至武帝受禪。世墓中絕。元帝渡江都建鄴。

兩火

永熙中。溫縣有狂人書曰。兩火被地。哀哉秋蘭。兩火。武帝諱秋蘭。楊后字。楊后卒幽死。

建元

庾翼。幼時嘗令璞筮公家及身。卦成曰。建元之末。丘山傾。長順之初。子凋零。及康帝即位。將改

元爲建元。或謂庾冰曰。子忘邵生之言邪。丘山上名。此號不宜用。冰撫心歎服。郭璞傳

汝陰

鄧攸爲淮南太守。夢行水邊。見一女子。猛獸自後斷其鞶囊。占者以爲水邊有女。汝字也。斷鞶囊者。新獸頭代故獸頭也。不作汝陰。當汝南也。果遷汝陰。晉書

未

王敦舉兵。夢一木破天。以語許遜。遜曰。非佳兆。

也。時吳猛同謁在坐。曰木上破天。未字也。公未可妄動。敦不聽。以至於敗。

剡

道經云。兩火一刀可以逃。言剡中名山。可以避災也。故漢晉以來多隱逸之士。括州天姥是其處。會稽集

王恭

王恭在京口。民間謠云。黃頭小人欲作賊。阿公在城下指縛得。又云。黃頭小人欲作亂。賴得全

刀作蕃扞。黃字上。恭字頭也。小人。恭字下也。金刀劉也。尋如謠言。

桓靈寶

東晉桓靈寶時。朱雀門下忽有兩小兒。通身如墨。相和作芒龍歌。路邊小兒從而和之。數十人。歌云。芒龍首。繩縛腹。車無軸。倚孤木。聲甚哀楚。聽者亡歸。日既夕。二小兒還入建康。至閣下。遂成一雙漆鼓槌。鼓吏列云。槌積久。此恒失之。而復得。不意作人也。明年春而靈寶敗。言車無軸。

倚孤木。桓字也。荊州送靈寶首。用敗籠因包裹之。又以芒繩縛其屍。沈諸江中。悉如童謠所言。

馮昌

晉符融嘗爲司隸校尉。京兆人董豐遊學三年而返。過宿妻家。是夜妻爲賊所殺。妻兄疑豐殺之。送于有司。豐不堪楚掠。自誣。融察而異之。問曰。汝行往返。頗有怪異。及卜筮。否。豐曰。初將發夜。夢乘馬南渡水。返而北渡。復自北而南。馬停水中。鞭策不去。俯而視之。見兩日在於水上。馬

左白而濕。右乾而燥。寤而心悸。竊以爲不祥。還之夜。復夢如初。問之筮者。筮曰。憂獄訟。遠三枕。避三沐。旣至。妻爲具沐。夜授豐枕。豐記筮者之言。皆不從。旣乃自沐。枕枕而寢。融曰。吾知之矣。馬左而濕。濕水也。左水右馬。馮字也。兩日。昌字也。其爲馮昌乎。于是推檢獲昌而詰之。具首服。曰。本與其妻謀殺董豐。期以新沐枕枕爲驗。是以誤中婦人。本傳

按拊掌錄所載事與此相類。附錄之。西川費

孝先善軌革。世皆知名。有客人王旻。因集貨至成都。求爲卦。孝先曰。教住莫住。教洗莫洗。一石穀搗得三斗米。遇明卽活。遇暗卽歿。再三戒之。令誦此數言足矣。旻受教行。塗中遇大雨。憩一屋下。路人盈塞。乃思曰。教住莫住。得非此邪。遂冒雨而行。未幾屋倒。獨免。旻之妻已謁鄰人。俟旋歸。將欲毒之。約其私人曰。今夕新浴者乃夫也。日欲晡。呼旻洗沐。重易巾櫛。悟曰。教洗莫洗。得非此邪。堅不從。婦怒。

不省。因反自沐。夜半反被害。旻驚睨罔測。遂獨囚繫。官府拷訊就獄。不能自辯。郡守錄狀牘。旻悲泣言曰。歿卽歿矣。但孝先所言終無驗耳。左右以是語上達。翌日郡守呼旻問曰。汝鄰比何人也。曰康七。遂遣人捕之。殺汝妻者必此人也。已而果然。因謂僚佐曰。一石穀搗得三斗米。非康七乎。旻旣辯雪。誠遇明卽活之數與。

益州

王璿轉廣漢太守。嘗夜夢懸三刀於梁上。須臾又益一刀。意甚惡之。主簿李毅賀曰。三刀爲州。又益一者。明府其臨益州乎。後果然。晉書

苻堅

苻堅生而背有赤文。隱起成字。曰艸付臣。又土本傳

按姓有苻符。苻堅其先本姓蒲。以識文改爲苻。苻融其先魯頃公孫。仕秦爲符璽郎。卽以爲氏。故堅之姓从艸。融之姓从竹。顏魯公干

耳。祿書曰。从艸者爲姓。从竹者爲印。尚未詳考

慕容熙

慕容熙初立。有童謠曰。一束藁。兩頭燃。禿頭小。來滅燕。後爲慕容雲所滅。雲本姓高。小字禿頭。藁字上艸下禾。兩頭燃則禾艸盡。乃高字。

劉

二口建戈不能方。兩金相刻發神鋒。空穴無主奇入中。女子獨立又爲雙。二口建戈。劉也。晉姓

金行。劉姓又有金。故曰兩金相刻。空穴無主。奇入中。爲寄字。女子獨立又爲雙。奴字。孔子河雒

寄苻

上五盡寄致太平。艸付合成集羣英。前句則宋祖寄奴。後句則太子義苻也。劉向識

未

張斌當應舉。夢豎竿中天。索統曰。此未字也。斌果停。按此夢如遇未年月日應。

賂賓王

裴炎爲中書令。時徐敬業欲反。令賂賓王畫計。取裴炎同起事。賓王足踏壁靜思。食頗乃爲謠曰。一片火。兩片火。緋衣小兒當殿坐。教炎庄上小兒誦之。并都下童子皆唱。炎乃訪學者令解之。召賓王至。數啖以寶物錦繡。皆不言。又賂以音樂妓女駿馬。亦不語。乃將古忠臣烈士圖共觀之。見司馬宣王。賓歛然起曰。此英雄丈夫也。卽說自古大臣執政。多移社稷。炎大喜。賓王曰。但不知謠識何如耳。炎以謠言片片火緋衣之。

事白之。賓王卽下。北面而拜曰。此真人矣。遂與敬業等合揚州兵起。炎從內應。與敬業等書。惟有青鸞字。人有告者。朝臣莫之能解。則天曰。青者十二月。鸞者我自與也。遂誅炎。敬業等尋敗。

會稽錄

美人

沈雲卿夢噉羹甚寒。仰見天上有無二兩字。明日以告金迴秀。迴秀曰。羹寒無火也。非美乎。天無二字。非人乎。以鄙人觀之。君當有美人彘中

之喜也。沈是日果遇美人苗蘊。顏色絕代。

玄散堂詩

姚崇宋璟

唐玄宗初登極。夢二龍一符自紅霧中來。上大隸姚崇宋璟四字。劫之兩大樹上。宛延而去。夢迴。召申王圓兆。王曰。兩木相也。二人名爲天遣龍。致於樹。卽知崇璟當爲輔相兆矣。上歎異之。龍城錄

誌公詞

祿山之亂。梁朝誌公大師已有詞曰。兩角女子。綠衣裳。却背大行。邀君王。一止之月。必消亡。兩角女子。安字也。綠者祿也。一止。正字也。果正月敗亡。嘉話錄

普滿

澤潞有僧號普滿。言事往往有驗。建中初。于潞州舍中題詩云。此水連涇水。雙珠血滿川。青牛將赤虎。還號太平年。題詩後人莫能知。及賊泚稱兵。衆方解悟。此水者泚字也。涇水者。自涇州

兵亂也。雙珠者。泚與滔也。青牛者。興元二年乙丑歲。乙者木。丑者牛也。明年改元。貞元歲在丙寅。丙者火也。寅者虎也。至是賊已平。廣古今五行記

申蘭申春

謝小娥年十三。初嫁大賈任華。父升與華往長沙貿易。忽夢父泣謂曰。吾與汝夫湖中遇賊。殺我者車中猴。門東艸。夢其夫泣曰。殺我者禾中走。一日夫夢覺。徧訪能解。有洪州使君李公佐。教之曰。殺汝父申蘭也。殺汝夫申春也。蓋猴申

生車去兩頭。爲申字。門東艸爲蘭字。禾中走。穿田也。亦申字。一日加夫爲春字。小娥乃易男服。泛江湖。詢訪有申邨。邨中有申蘭申春兄弟。因往求傭。年餘。乃知其爲殺父殺夫之盜。俟二盜飲酒醉。小娥急呼鄰人捕獲之。詞伏就法定罪。小娥乃出家爲尼。仍名小娥。示不忘本也。

班義

令狐相出鎮淮海日。支使班義與從事俱遊大明寺之西廊。忽睹前壁題云。一人堂堂。二曜同

光。泉深尺一。點去水傍。二人相連。不欠一邊。三梁四柱。烈火烘然。除却雙勾。兩日不全。諸賓慕顧之。駐足良久。莫能辨義。曰。一人大字。二曜明字。尺一十一寸。非寺字乎。點去水。水字。二人相連。天字。不欠一邊。下字。三梁四柱。而烈火無字。兩日除雙勾。比字。得非大明寺水。天下無比乎。衆皆嘆曰。黃絹之奇智。亦何異哉。令狐公稱嘆。彌日。詢之老僧曰。頃年有客獨遊。題之而去。

獨眠孤館

唐州押衙崔慶成。轄香藥綱詣內庫。抵皇華駟舍。夜見美婦人曰。今日見君。君必有疑。今日舍君。我寧不悔。俟君回轅。別圖後會。擲字云。川中狗。百姓眼。媽撲兒。御厨飯。洎還。不敢宿皇華駟。寓旅邸。前婦人來曰。今日之事。可諧否。十二字能辨否。慶成不對。因命青衣進酒。終不舉盞。乃作詩曰。妖鬼芳魂自古靈。多情心膽似平生。知君不是風流物。却上幽原怨月明。青衣曰。小娘子嘗養鸚鵡十餘年。竟不言。乃其驗乎。婦人嘆

曰是矣。乃作啞鸚鵡詩云。雕籠馴養許多時。終歲曾無一句詞。深恨化工情太誤。因何偏與好毛衣。擲紙於地。燈火俱滅。丁晉公嘗見十二字。曰。川中狗。蜀犬也。獨字。百姓眼。民目也。眠字。媽撲兒。瓜子也。孤字。御厨飯。官食也。館字。據遺按七修類稿。記此爲陶穀事。媽撲兒作虎撲兒。

裴度

元和元年。淮西帥吳少誠歿。子元濟拒命。十三

年召裴度將擊焉。度既至，因命封人深池濠，發地得石，上有銘文曰：井底一竿竹，竹色深綠綠，雞未肥，酒未熟，障車兒郎且須縮，度以示從事，令辨其義，咸不能究。俄有一卒自行間躍而賀曰：吳元濟成擒矣。度驚訊之，曰：石銘其兆也。井底一竿竹，竹色深綠綠者，吳少誠由行間一卒，遂擁十萬兵爲一方帥，喻其榮也。雞未肥，無肉也。肥去肉爲巳，酒未熟，無水也。酒去水爲酉，障車兒郎，兵革之士，且縮者，謂宜退守其所，由是

言之，則巳酉日當成擒也。苟未及期，則可俟矣。度深歎異。是歲冬十月，李愬生得元濟，校其日果巳酉。于是度益奇卒之辨，擢爲裨將。宣室志

按楊用修曰：宋人四六，有學慚鼠獄，智乏雞碑之句，正用此事。陳用晦曰：二語見唐丁用晦芝田錄序。楊訛作宋人四六。

杜牧

杜牧於宰執求小儀，不遂，請小秋，又不遂，嘗夢人謂曰：辭春不及秋，昆脚與皆頭。後得比部員

外尚書故錄

裴元質

河東裴元質。初舉進士。明晨唱策。夜夢一狗從竇出。挽弓射之。其箭遂擊。以爲不祥。曹良史曰。吾往唱策之夜。亦爲此夢。夢神爲吾解之曰。狗者第字頭也。弓者第字身也。箭者第字豎也。有擊爲第也。尋唱策果如夢焉。朝野僉載

安吉

臨安縣令張宣。謁選時。夢一女子云。某是明府

邑中之客。有十一口。依在貴境。及後補湖州安吉令。始悟一女子爲安字。十一口。吉字也。及秩滿。又將選。復夢前女子曰。明府又當宰妾之邑也。往者家屬凋喪略盡。今止三口爲累耳。明府到後數月。亦當辭去。及唱官日。乃得杭州臨安縣令。宣歎曰。三口臨字也。數月而去。吾其憂乎。到任半年卒。唐鍾輅前定錄

軒轅先生

羅浮先生軒轅集。唐宣宗召入內廷。問曰。朕得

幾年作天子。卽把筆書曰。四十年。書十字跳脚。宣宗笑曰。朕安敢望四十年乎。及晏駕。乃十四年也。杜易編

甄仲舒

鄒湛嘗夢一人來拜。自稱甄仲舒。求葬。湛覺。思之曰。字合西土。瓦中人也。乃往取。果得之。因厚葬焉。夜復夢其人拜謝。

甌杵爲妖

建中末。獨孤彥者。泊舟淮泗。步月至佛寺。有二

丈夫。一人身長黑衣。稱姓甲。名侵計。第五。一人身短青衣。姓曾。名元。黑衣者曰。吾之先本盧氏。少以剛勁聞。凡物有滯而不可通者。必侵犯以計。忤之時。皆謂我侵計。後遇仇。易姓甲氏。以逃患。吾素精藥術。而升降上下。卽假手於人。吾有舅氏。起居未嘗不俱。曾元曰。吾陶唐之後也。受姓於姚。曾者。其子孫以字爲代。故謂曾氏。吾素徧燥。負氣凌上。遭下流沸騰之謫。吾賦性堅正。赴湯蹈火。調人之急。語未卒。寺僧歸。人馳去不見。

彥乃悟曰。曾元豈非甌乎。文以瓦附曾。甌字也。名元者。以瓦中之畫。致瓦字之上。甲侵計。豈非鐵杵乎。以午附木也。甲者。東方甲乙木也。第五者。亦假午字也。侵計者。反語金截。截附金。鐵字也。總而解焉。得非甌及鐵杵耶。明日果於積壤中。得一鐵杵一甌。

王晉公

唐乾符中。晉公王鐸爲諸道都統。時木星入南斗。數夕不退。鐸觀之。問諸星者吉凶安在。咸曰。

金火土犯斗。卽爲災。惟木當爲福耳。時有術士邊岡。洞曉天文。精通曆數。謂晉公曰。惟斗帝王之宮宿。惟木爲福神。當以帝王占之。然則非福於今。必當有驗之後。未敢言之。他日晉公屏左右。密問岡曰。木星入斗。當王之兆。木在斗中。朱字也。識者言唐世嘗有緋衣之識。或言將來革運。或姓裴。或姓牛。以裴字爲緋衣。牛字著人。卽朱也。所以裴晉公度。牛相國僧孺。每罹此誦。安知鍾於碭山之朱乎。北夢瑣記

黃巢

黃巢令皮日休作讖詞云。欲知聖人姓。田八二十一。欲知聖人名。果頭三屈律。巢大怒。蓋巢頭醜。掠髻不盡。疑三屈律之言爲譏已也。遂及禍。悅生隨抄

按該聞錄言皮日休陷黃巢。爲翰林學士。巢敗被誅。今唐書取其事。又按尹師魯作太常寺丞皮子良墓誌。獨曾祖日休。避廣明之亂。徙籍會稽。依錢氏。官太常博士。贈禮部尚書。

祖光業爲吳越丞相。父璨爲元帥府判官。三世皆以文雄江東。據此則日休未嘗陷賊。爲其翰林學士被誅也。光業見吳越備史頗詳。師魯文章傳世。且剛直有守。非欺後世者。可信不疑也。又按唐潯陽簿劉肅所著唐世語林。已明載皮日休黃巢時遇害。其子仕錢鏐矣。

艸重生

初董昌未敗前。狂人於越州旗亭客舍題詩四

句云。日日艸重生。悠悠傷素城。諸侯逐白兔。夏
滿鏡湖平。初人不曉其詞。及昌敗方悟。艸重董
字。日日昌字。素城。越城。隋越國公楊素所築也。
諸侯者。猴乃錢鏐。申生屬也。白兔。昌卯生屬也。
夏滿。六月也。鏡湖。越中也。會稽錄

呂洞賓

呂洞賓謂侯生曰。蛇蝎天地。淘以自然之氣。使
之生。以遂性。殺此救彼。有損無益。取紙隱語。三
口共一室。室畔水邊清。乃呂洞賓字。

許碑重立

漢太尉許馱碑久磨滅。諸孫再刻之。題八字碑
陰曰。談馬礪畢。主田數七。人莫能曉。徐鉉父延
休一見解曰。談馬許字。礪畢碑字。主田重字。數
七立字。

三夢

段思平生有異兆。蒙主揚于真忌之。使人索捕。
思平逃匿。飢摘野桃剖之。核膚有文曰。青昔思
拆之曰。青乃十二月。昔乃二十一日。今楊氏政

亂吾當以是日舉義乎。遂起兵。方至河干。是夕思平夢人斬其首。又夢玉珣耳闕。又夢鏡破。懼不敢進兵。其軍師董迦羅曰。三夢皆吉兆也。公爲大夫。夫去首爲天。天子兆也。玉珣去耳。爲王之兆也。鏡中有影。如人有敵。鏡破則無影。無影則無敵矣。三夢皆吉兆也。思平乃決。明旦遂引兵渡江。逐楊氏。而有蒙國。遂改國號曰大理。時

晉天福二年也。

滇記

王溥

後漢王溥家貧。穿井得鐵印。銘曰。傭力得富。至億庾。一土三田。軍門主溥。以億錢輸官。得中壘校尉。三田一土。壘字。校尉掌北軍壘門。故曰軍門主。拾遺錄

石笋隱字

成都子城西金容坊。有石二株。挺然聳峭。高丈餘。耆舊傳云。其名有六。曰石笋。曰蜀妃墳。曰沈犀石。曰魚鳧仙壇。曰西海之眼。曰五丁石門。皆非也。圖經曰。乃前秦寺之遺址。諸葛亮掘之。方

驗有篆字曰蠶叢氏立國誓蜀之民以二石柱
橫埋連接銛鐵其中一南一北無所偏邪又五
字濁歎觸觸時人莫曉後蜀相范賢議曰亥
子歲濁字可記主水災寅卯歲歎字可記主饑
饑巳午歲燭字可記主火災辰戌歲觸字可記
主兵災申酉歲蠲字可記主稼穡富贍悉以年
事應驗如符響

劉龔

廣南劉龔初開國營構宮室得石識有石篆十

六其文曰人人有一山山值牛兔絲吞骨蓋海
承劉解者云人人有一大人也山山出也值牛
者龔建漢國歲在丑也兔絲者晟襲位歲在卯
也吞骨者滅諸弟也越人以天水爲趙爲蓋海
指宋國姓也承劉者言宋受劉氏禪也

魏罐

魏罐侍郎知廣州子城一角忽頽一古磚有四
大字云委於鬼土是魏字公感其事大築新之
罷還未幾儂寇廣州外城一擊而圯獨子城堅

民賴以生。賊平。以公有前知之備。加諫議大夫。
吉人

哲宗卽位既久。而皇嗣未立。密遣中貴往泰州。
天慶觀問徐神翁。翁但書吉人二字授之。既還。
奏呈。左右皆無知其說者。哲宗升遐。徽宗卽位。
自端邸入承大統。而吉人二字。合成潛籓之名。
無少差。徽宗名佶。宋何遠春渚紀聞

鞋

殷祕書願。夜夢牛皮上有二土。又有赤玉在其

上。其子年十六解曰。牛皮。革也。二土是圭。是鞋
字也。赤朱色。入玉是珠字也。大人當得珠履乎。
果然。

張考功

張郎中環嘗夢人告之曰。老兒伸了脚。切莫出
頭來。汝前程止此。可記之。張自意此夢不祥。凡
遇老者必遠避之。恐不利於已。無復志進取矣。
後中進士。任考功郎中。老字伸脚是考字。切字
不出頭爲功字。位遂止此。

曾

曾崇範妻先許嫁數人。每至親迎之夕。其夫輒
歿。一夕夢人謂曰。田頭有鹿角。田尾有日炙。乃
汝夫也。後嫁乃悟其夢。西京雜記

三人

明太祖謂劉基曰。吾夜夢有三人共弁一血帽。
何與。基曰。三人首弁血帽。衆字象也。是謂得衆
之兆。越數日海寧果以城降。

周彪

尚書吳交石公。初爲節推。部民有女初嫁。夕被
殺於帳中。壻入方覺。不知爲誰所害。告之官。連
及四十餘人。公鞫莫得。沈思屢日。禱之所奉大
士前。夜夢有虎銜三刀。跳一舟中。公覺。謂虎加
三刀。乃彪字也。舟者周也。殺人者其周彪乎。一
詢立服。

田中伸足

弘治乙丑探花謝公丕。上春宮。卜於某丞相廟。
夢坐田中。伸足膝外。解者曰。田伸脚。甲字也。果

第故夢須善圓。耳談

雙天西日

長泰縣戴侍郎未第時祈夢得四字曰雙天西日。至癸酉領鄉薦。雙天癸字。西日酉字也。耳談

葉簡

葉簡剡人。善卜筮。凡有賊盜皆知其姓名。有鄉人失牛。卜之曰。占失牛已被家邊載上州。欲知賊姓。一斤求。欲知賊名。十干頭。乃鄰人丘甲爾。聞奇錄

辛未狀元

辛未會試江陰袁舜臣作謎詩於鐙上云。六經蘊籍胸中久。一劍十年磨在手。杏花頭上一枝橫。恐洩天機莫露口。一點纍纍大如斗。掩却半牀何所有。完名直待掛冠歸。本來面目君知否。惟蘇州劉城一見能識之。乃辛未狀元四字。

戊午解元

嘉禾張翼素無文名。嘉靖戊午春。偶夢神語曰。成不成。平不平。綠水灣頭問老僧。及邑試。竟置

劣等自郡城徒步歸過蕭寺少憩焉有老僧捧茗進曰解元請茶吳忽憶前夢問曰此是何地僧曰是綠水灣吳喜且疑本年果發解所云成不成平不平蓋戊午字云

困無多日

莆廖太守梯未第時夢枯木高寸許以篋箍之回首又見日落西山廖悒悒道士曰夢甚佳篋圈箍木乃困字也日落西山無多日也先生困無多日矣明年果登第

耳談

戊戌進士

有祈夢者上而甲榜下而乙榜成否曰上不成下不成因大憤後乃中戊戌進士上下皆不成也

耳談

三春

新安某君子病召乩卜之得三春二字衆以爲可恃無虞後九日竟卒蓋三春者九日人耳

徐文長集

黃猷吉

黃猷吉清源人。爲淮揚兵憲。以病歸。家居頗好道術。緇流羽客。無不接引。一日晝寢。有僧來謁。而闈者不爲通。翌日至。又如之。僧嘆惋曰。吾以爾主好道。故來救其厄。今若此。信命也。取筆題字數行於室東小廡而去。翌日立秋。其夜火發。宅產蕩盡。獨僧所題小廡無恙。闈者因具言所以。視其書曰。坐不得。行不得。愁無心。口添畫。大口小口。青黃共色。有解曰。坐不得。行不得。立也。愁無心。秋也。口添畫。日也。大口小口。回也。青黃

共色。綠也。凡染綠者。必青與黃合也。乃立秋日回祿也。居東集

三人同一口

楊忠烈公漣。少落拓。不肯習程文。諸生皆心薄之。彭幼朔獨奇以爲必售。癸卯元旦試諸生。批漣文後云。但得三人同一口。九霄之上便飛騰。漣以是科鄉薦。主考曰孫如游。董復亨。房考曰劉文琦。三人同口之徵也。

西瓜

有一人以求嗣詣何仙祈夢。夢人抱一西瓜相贈。又見半子於瓜之外。圓者稱賀云。瓜最多子。行且見累累矣。其人至老不得嗣。自以夢無驗。語方大古。方笑曰。瓜露半子。公其孤乎。始悟。

字觸 卷之一終

字觸 卷之二

櫟下老人 輯

屯溪螺隱 較

外部

李蟻

唐司空李蟻始名虬。赴舉之秋。偶自題名于屋壁。經宵忽覩名上。爲人添一畫。乃成虱字矣。蟻曰。虱者蟻也。遂改名蟻。明年果登第。南楚新聞。

北千

李嵩叛。有書招楊德輝赴齋。有老道士崔無斲。自言患聾。有道而託算術。往往預知吉凶。德輝問曰。將欲北行何如。崔令畫地作字。楊乃書北千兩字。崔公以千插北。成乖字。去卽乖耳。楊遂不果去。而李嵩齋日就擒。道士多罹其禍。楊之幸免。由崔之力也。

懈

曹翰興國四年。從征幽州。率部攻城東南隅。卒掘土得懈以獻。翰謂諸將曰。懈水物而陸居。失

所也。且多足。彼援將至。不可進拔之象。况懈者。解也。其班師乎。已而果驗。本傳

貝州

慶曆四年。貝州卒王則據城叛。詔明鎬加討。久無功。參知政事文彥博請行。仁宗欣然遣之。且曰。貝字加文爲敗。卿必擒則未逾月。捷報聞。詔拜平章事。曲赦河北。改貝州爲恩州。

解

臨邛費孝先山人。賣卜成都五十年。自云傳管

輅軌革之術。其卦有歌有影。世稱其術。四方士大夫求占者甚衆。其尤可怪者。或因字以決吉凶。然一字而數人占得之。其應之者不同。有一郎官占得一解字。尋出守解州。一舉子亦得一解字。是年爲本府魁薦。一不肖子亦得解字。俄以屠刀被刑。牛角有刀。解也。事莫可曉。事文類聚

儋州雷州宐州

蘇子瞻謫儋州。以儋與瞻字相近也。子由謫雷州。以雷字下有田字也。黃魯直謫宐州。以宜字

類直字也。此章子厚駮諛之意。當時有術士曰。儋字从立人。子瞻其尚能北歸乎。雷字雨在田中。承天之澤也。子由其未艾乎。宜字乃直字。有蓋棺之義也。魯直其不返乎。後子瞻北歸至毘陵而卒。子由退老于潁十餘年乃終。魯直竟卒于宜。玉露

謝石

謝石潤夫。成都人。宣和間至京師。以拆字言人禍福。求相者但隨意書一字。卽就其字離拆而

言無不奇中。名聞九重。上皇因書一朝字。令中
貴人持往試之。石見字。卽端視中貴人曰。此非
觀察所書也。中貴人愕然曰。但據字言之。石以
手加額曰。朝字離之爲十日十月字。非此月此
日所生之天人。當誰書也。一座皆驚。中貴馳奏。
翌日召至後苑。令左右及宮嬪書字示之。論說
俱有精理。錫賚甚厚。補承信郎。緣此四方求相
者。其門如市。有朝士。其室懷娠。過月。手書一也
字。令其夫持問。是日坐客甚衆。石詳視字。謂朝

士曰。此閣中所書否。曰。何以言之。石曰。謂語助
者。焉哉乎也。固知是公內助所書。尊閣盛年三
十一。否。曰。是也。以也。字上爲三十。下爲一字也。
然官人寄此。當力謀遷動。而不可得否。曰。正以
此爲撓耳。蓋也。字著水則爲池。有馬則爲馳。今
池運則無水。陸馳則無馬。是安可動也。又尊閣
父母兄弟近身親人。皆當無一存者。以也。字著
人則是他字。今獨見也。字而不見人故也。又尊
閣其家物產亦當蕩盡否。以也。字著土則爲地。

字。今不見土只見也。俱是否。曰誠如所言。朝士
卽謂之曰。此皆非所問者。但賤室憂懷娠過月。
所以問耳。石曰。是必十三箇月也。以也字中有
十字。并兩傍二豎下畫爲十三也。石熟視朝士
曰。有一事似涉奇怪。因欲不言。則官人所問正
決此事。可盡言否。朝士因請其說。石曰。也字著
虫爲虵字。今尊閣所娠。殆虵妖也。然不見虫。則
不能爲害。謝石亦有薄術。可爲官人以藥下驗
之。無苦也。朝士大異其說。固請至家。以藥投之。

果下數百小虵。都人益共神之。而不知其竟挾
何術。宋道直拆字傳

宋高宗微行。遇石於市。在衆人中。石不知爲上
也。上因舉杖于地。書一畫令相。石驚。因請再書。
上又舉杖于地。寫一問字。爲填土所梗。兩傍俱
斜側飄飛。石尤驚。曰。前字土上安一。是王字也。
後字問飛兩傍。左右皆君。必是主上。遂下拜。上
曰。毋多言。明當召卿。次日召見。便殿書一春字。
命相。石奏曰。秦頭太重。壓日無光。上默然。賜賚

命出。是時秦檜專權。聞之大怒。乃陰中以他事。竄逐嶺表。一卒押行。抵中途。遇一人依山而立。舉招牌相字。石自忖曰。人亦有善此術者乎。因寫已姓謝字令相。術者笑曰。子亦術士也。石曰。何以見之。術者曰。乃寸言中立身耳。石又寫已名令相。術者曰。甚非佳兆。石逢卒則碎。子同行者卒也。未審何姓。卒答曰。某姓皮。術者慘然謂石曰。石逢皮則破。子其不返矣。石曰。數定固莫能逃也。然子亦專此藝。請畫字試占子之行藏。

術者曰。吾在此卽字也。何以寫爲。石曰。人立山傍。成仙字。子其仙乎。術者笑而不答。轉盼間忽失所在。石竟不返。按周益公二老堂雜志云。謝石善拆字。歸蜀有士人文覺。戲以乃字爲問。爲其無可拆也。石曰。及字不成。君終身不及第。有人遇于塗。告以婦不能產。書日字于地。石曰。明出地上。得男矣。其驗如此。每肆中以牌寫千字。不識字者任其所指。禍福皆應。邵溥尚書第三子不肖。遇其拆字。卽加窘辱。石甚畏之。石在徽

宗時嘗特稱承信郎一日謂石我亦能拆字石詰之則曰汝姓謝所謂身在討論之中石則終身右選不能出頭聞者大笑

說海

太

徽宗令中官索東宮書一字來乃以太字進問石石曰此天子也上詢謂何曰太字點微橫此必太子他日移置諸上豈非天子耶

談 鏡園山叢

周生相字

建炎間術者周生善相字車駕至杭州時金人

驚擾之餘人心危疑執政呼周生偶書杭字示之周曰懼有驚報乃拆其字以右邊一點配木上卽爲兀术不旬日果傳兀术南侵當趙秦廟謨不協各欲引退二公各書退字示之周曰趙必去秦必留日者君象趙書退字人去日遠秦書人字密附日下字左筆下連而人字左筆斜貫之蹤跡固矣欲退得乎旣而皆驗

湧

汪國正遠猷登第已踰壯室以未有子爲憂已

而汪授吳江簿生男。乃悟湧字。江下男也。

失 謝石事

士人樊將妻失珍珠冠。書失字命夫詣肆。石曰。盛門姻戚。豈有朱氏乎。樊曰。吾妻朱氏也。有第二十八者乎。曰。妻兄也。曰。然則從此取之。樊曰。此人素持行檢。家豐富。豈肯爲此盜事。曰。不然。必因與之交關。誤持去。其物固在。可得也。樊因語妻。妻詢之侍婢云。數日前二十八舅曾借物否。婢云。昨欲出門。曾言借帽子。旣而不用。就還。

原未嘗開匣也。設啓視之。冠在帽下。蓋曩因晒帽。誤置其中。久而忘之矣。

申

一人病。書申字以問。中帶燥筆。客退。謂坐者云。丹田旣燥。其人必死。或曰。應在幾日。曰。不過明申時。果然。

飛

新安朱安國善相字。紹興三十二年六月。至鄱陽。是歲壬午。當舉場開。士人多在州學。從之占。

問段毅夫示以飛字。朱書其側曰：二九而升，扣其說。對曰：飛之爲字，从二从九从升。但據筆畫言之，不能知其義。未可便決禍福。及秋試，以第十九名薦送。朋友賀之曰：十九者第二九也。君必正遇已而省試失利。乾道元年乙酉再舉，復中十九名，遂登第。始悟二九而升者，兩次十九方成耳。

慶

有老齋僕王明者，少時亦讀書，爲貧所苦，棄業

爲隸。書慶字示之，笑曰：此雖小人，中心作文而不遂，又恨其必字勢偏左。主左脚踏蹙之疾，且夕却招婚姻之喜。坐者云：所說極切當。其人三十歲中風溼，故左脚不良。但今已七十，自有妻安得如後一轉語。後旬日爲人家作媒嫁女，頗獲謝禮。

易

趙哲彥通以周易應乙酉舉，遭黜。謀改習賦，朱適再來，因書易字求相。朱曰：得非有更易之意。

乎。此字从且从勿。當且勿易。終必得遂。仍舊預
貢。

去 見彞堅志

文惠公爲叅知政事。上章丐去。未諧。朱訪予。予
曰。用書信中。字可占否。曰可。卽指書中去字使
觀之。其體帶艸。朱捧玩。咨嘆曰。此尊官是貴人。
今所占何事。予曰。見任兩府。方力求去。朱曰。正
鑽頭出天上。將位冠百僚。無庸詢休逸之請。後
兩月拜相。

一

楊王沂中間居微行。遇一相押字者。王以所執
拄杖就地作一畫。相者驚拜曰。閣下自宜愛。王
愕然問其故。相者曰。土上一畫。乃王字也。當封
王無疑。

帛

文皇在燕邸時。嘗微行。詰一相字者。書帛字令
相。其人卽跪拜稱死罪。上驚問故。對曰。皇頭帝
脚。必非常人也。又一人書帛字。曰。是爲白巾。君

必孝服。

來遠樓

張乘槎善相字。浙江舊有拱北樓。王叅政蒞浙。改爲來遠樓。初揭扁。命槎占之。槎曰：三日內主有哀喪事。如期。王公母夫人病卒。王延槎問故。來有喪字形。遠有哀字形。走之二點相連。淚點也。

胡弘

寧波胡弘深于易理。言多奇中。尤善相字。嘗遇

二士于途。將赴鄉試。問得失。弘云：二君當一中。一以有服阻。皆不以爲然。已而一喪父。不得入試。一領薦。或問之。弘曰：喪父者問時。適有人汲水而過。水與立。泣字也。故知其當哭泣。領薦者問時。偶有人立于傍。成位字。故知其必中。

金馬守愚事

卜者沈某以金字問馬曰：君其五行中安身立命乎。恨與小人作緣。三十年後以此敗。亦以此獲。後沈以後妻故有雀鼠之訟。乃其婦頗健。持

門戶卒藉溫飽。憶拆字時恰三十一。
有以毛字問訟。謝曰。必遭反手。宜防之。時此人
實爲干証。事起挑唆。懼禍強爲和息。又以手字
決之。其人左右相之曰。若做干証。必至才丁。已
而果被官怒責之。

竹

新安汪龍雙瞽。人稱瞎龍。遇物起數多奇。中有
問六甲寫竹字問龍。龍曰。兩個是雙生。要在二
月。俱奇數。皆男也。但恐不久。問何故。曰。此竹無
根。故不久耳。後果然。

貴

四五舉子赴京。共寫貴字問龍。曰。好。必中。其中
有一獨目者。臨去畱之。私語曰。今此去。只中相
公一人。餘俱不中。問故。曰。不見貴字。乃中一目
人乎。果驗。

耕

有以耕字問行人。龍曰。已來鄉井矣。又以耘字

問之曰相去咫尺。在田間與人相談也。少頃其人歸。問之曰。適在井字亭。與人閒話片時耳。

哭

有以哭字問病。曰。是兄何人。曰。父也。曰。止生足下一人耳。曰。然。曰。不妨。問何故。曰。上面兩口。雙全。下面一人。以時而論。戊日便好。哭為水。戊土制之。不但如此。還應得一子。以犬字傍有一點也。

尼

有以尼字問病。龍曰。再加一夕成屍。明日必死。又以生字參決。曰。明日為丑。生字上是牛。下是土。况病人亦不宜泥土。臨死無疑也。明日果死。

彤

以彤字問病。龍曰。此遠人病也。其人驚問故。曰。此字音同。其形似彤。彤為祭之明日。若在家。豈有既祭而尚卜者乎。且杉木從丹。棺已漆矣。以時而論。一月之間。當以舟載還。蓋左傍有舟形。右傍有帆形也。既而半月果至。蓋當時彤字寫

舟上一點故止半月云。

陀

有以陀字問訟吉凶。曰：此察院狀詞也。以形而觀虎頭蛇尾也。以意而論其庇在他。又音與拖同。不成完。恐不能完結。扯長而已。

唐

有以唐字問母病者。曰：上康字頭。下居字脚。主康居無恙。

瓜子

以瓜子問父病。曰：死期近矣。合瓜子為狐字。固知必不生矣。

汗巾

一人以汗巾問府取有無。曰：不但府取。兼入泮。定有衣巾。蓋布為有字形。汗為泮字形也。巾者衣巾。布色新澤。必有更新之意。

有一權貴無子。知龍名。以門生袁姓者補南工部員外。寄一白圍棋子。托問後嗣。袁至。微服付棋子占之。龍曰：公姓袁否。曰：然。我何如。

人龍以手周圍模之曰員外曰我所占何事
曰此白物也應自北來必自北京當局之貴
人其第一着所卜者惟其子乎曰有無何如
曰此物非木非石經水火鍛煉而成全無生
氣安得有子以理而推亦當謝局須急下官
着可也巳而權貴卒于任竟無子術之奇確
如此

麻雀

徽守見龍之門如市恐其惑衆意欲處之一日

召至問我手中何物如合則釋爾不合斃杖下
矣龍求指一物示之方好卜決時堂下有少婦
訴冤守卽指此婦爲數龍曰一麻雀耳守驚曰
生乎死乎龍曰生死在老爺掌握中守曰此瞽
可與語數也蓋曰生則斃之曰死則出之守已
知其喻意矣但問何以云麻雀曰此婦年少佳
人又穿孝服以意解之爲麻雀云

哭

一日有罪犯同解子至門求卜曾聞御史磨墨

之說亦取硯磨之手重氣粗硯翻墨潑龍曰不
消磨矣此烏臺重犯也問能生否曰雖不遽死
一身重罪鍊案難翻罪犯哭曰某時運若此何
用生爲龍曰據此當遲七年逢戌遇呂姓官人
號寬可改軍罪丑年可回蓋哭字雙口爲呂下
有犬字爲戌運字爲軍用字爲川罪字爲四川
生者有丑字形也

龍有徒河南人欲辭歸謂龍曰明日有一宗
財物乞師助弟盤纏龍問其故徒曰適計行

裝慮無盤費偶見墻東缺月高升知有盜者
送財求卜也然晚必有捕者自西而來問卜
此物合歸于師五鼓有人叩門徒曰不必多
言但往西北行自然無事外人曰果如其言
否曰不誤外人曰有謝自後墻拋入請收之
徒因往取其資頃之有捕者兩人問數以易
經文王二字求示方向龍私念曰文王西伯
也本宜往西北捕之恐誤徒子之言漫爲謬
語東南上追之可得也盜因得脫

来

里父之子商于楚。數稔不歸。馬適在東藏寺。里父拽杖之寺訪馬求卜。適覲面。以杖倚米箱。揖之。馬問云。何具以對。馬曰。汝子已抵家。汝可速去。米貫一木。非来而何。里父歸。其子前候門矣。

鄭仰田

閩惠安鄭仰田善拆字。神宗末年。錦衣獨相。時枚卜韓蒲州劉南昌二公。畱中不發。葉福唐里居。召令試之。示以笋字曰。吾有二友欲得官。可

如意乎。鄭對曰。笋字上有兩個字。一個臣者宰相也。其兩宰相乎。但君不開口奈何。如欲大拜必也。君不成君乎。後神宗于彌畱之際命下。崇禎丙子。鄭在南中。臨淮侯召問南范大司馬入援行乎。時方象戲。以棋子馬字示之。鄭曰。馬行日步。今日下雨。不行也。又問北張大司馬可無恙乎。因以犀杯示之。鄭曰。犀字尸在。身上死矣。臨淮侯曰。只去位乎。曰。卽走亦遲矣。後皆如其言。

魏璫用事時。寫一囚字問之。曰。此當國一人也。復寫一飢字。曰。此不凡之人。然不良之人也。璫異而遣之。

骰子

倪鴻寶先生爲祭酒時。與烏程忤。將請告。遇鄭于官人席上。初未通名。取骰子中四紅子卜。鄭曰。京官四品而掌印者。惟大司成耳。公其祭酒倪公邪。公頷之。曰。公必與當事忤。姓名中帶骨。

字者。其人也。蓋骰子骨所成。而四面稜角。不能剋圓。以是知不合也。公意欲圖歸乎。必得請矣。以骰體方類口。四亦類口。乃回字也。後果然。

象棋車字

顧鄰初家居。遣伴持象戲中車往。鄭語來人曰。此非子所持。必大貴人遣來者。問其故。曰。一甲一名。非貴人而何。合局中惟車縱橫如意。此人文章事業必大顯。但可惜。今在局外耳。曰。得復起乎。曰。雖欲出山。柰半身不隨何。蓋車旣取出。

則不合棋是以知其有廢疾也。

全

天啓初將卜相南樂指全字爲占仰田曰全字
从人从王王四畫當相四人問其姓名曰全字
省三畫爲土當有姓帶土者省四畫爲丁當有
姓丁者省兩畫縱橫爲木當有名屬木者以所
省之文全歸之當有名全者南樂曰木非林尚
書乎曰獨木不成林名也非姓也已而拜莆田
貴池元城涿州四相俱一如其言

吞

晉江李焜與奄黨吳淳夫有隙指吞字以問仰
田曰彼勢能吞汝非小敵也從天從口非其人
吳姓乎然則何如曰吳以口爲頭彼頭已落地
矣汝何憂踰年而吳伏法

太平御覽

張莊節鎮東省時其子遺將往定省因叩休咎
隨意揭案上一書得太平御覽五十二卷終鄭
曰此一人乃大人也曾爲國平賊而名登御覽

者其貴無疑但卷終文盡也文盡則縱之以武其以武顯乎復揭後一頁乃五十三卷神仙因問尊大人壽幾何時五十二矣曰異哉太平本是將軍定不許將軍見太平其急流勇退尋神仙之學乎次年值變莊節殉難于太平樓而壽恰五十三其奇中如此

汗巾

有一世家子臨場出袖中汗巾與卜曰君家三代進士邪曰然君思中邪柰肚裏沒貨何蓋汗

字似从三从倒士而巾字少中字下一畫也

休

某先生致仕歸且浹歲呼馬詣第拈一休字訊焉馬取所書字承日影覆背凝睇忽曰異哉一轉便成兵字夏官乏員徵公其誰某笑曰吾長安塵土久無入夢生勿言居無何朝鮮事起某以邊材論薦趣攝少司馬

午

有以午字占子病者櫟公曰上乃人字臥而不

起下乃數之終占病豈宜見此後竟如言

行

周爾約行會書行字問何人得會曰得會者必
姓號有丁字脚者諸友皆無此脚惟惺字字字
乃丁字脚也果得之

靜

乙酉十一月以靜字占鄉試中幾人曰十二月
方揭曉爭字是解元頭中七人城內五人城外
二人已而果然或問故曰測此字時偶念及小

學天子爭臣七人諸侯爭臣五人城內侯地故
五人城外遠于京師故二人以遠于京師北直
故不言七人止合城內爲七也

子

有以子字問六甲者櫟公曰一个丫頭非女而
何果驗

徒

馮公失廝養兒書走字於僕掌上視櫟公時一
僕同至公曰雙人加走爲徒字覓之徒然耳然

是人更不須覓。不久卽亡。以走字離合之爲土。下人也。後日見廝養兒死大堤下。

携

一士人小試。寫一携字問之。曰。君問試事。必不如意。蓋携字進不成進。秀不成秀。才不成才也。後果然。

幾

謝柟公有傳。其子以下第憤激披剃者。謝憂甚。書幾字視櫟公。公曰。絲在人首。髮也。傍著一戈。

剃髮必矣。後果驗。

顧曲亭紀聞

閔

閔君母病。卽以姓視櫟公。公曰。以文臨門。非弔卽慶。病者在榻。無他慶事。弔當至矣。况字有門。內女不成之象。恐不能起矣。越數日驗。

曲亭紀聞

今

有以今字問六甲者。櫟公曰。此人一丁也。必生男。問何日。曰。逢丁始生。在念日。蓋有念字頭也。問平安否。曰。目今夏日火旺。人在丁上。正乘旺。

地主子母俱平安。

非翠

邑有大猾周體乾者。令公欲除之。以非字視櫟公。公曰。乾之左右。無不相逼者。除之必矣。既下獄。令公復指環翠樓翠字視公。公曰。字上二乾。皆以筆直之。左視乾卒。右視乾卒。乾不永矣。後為撫軍朴殺。曲亭紀聞

串字

有叩試事者。書串字。術者曰。不特鄉闈得雋。南

宮亦應高捷。蓋以串寓二中字也。一生在傍。亦書一串字。令觀術者曰。君不獨不與賓興。更有疾。詢其所以。曰。彼以無心書。故當如字。君以有心書。串下加心。乃患字耳。已而果然。

代 以下俱燕山吳崧若崙氏幾神驗存

武林劉友。書代字。問一人存亡。先生曰。此人必翁至親。乃盛德人。似有骨肉之變。隱而避也。友曰。然。長兄與幼弟有鬩牆之難。訟經年。所問乃仲兄。長齋事佛。見兄弟間相煎太急。勸弗從。忽

去不知所之。欲求方向故問。先生曰。仍在杭。問
何時見。先生曰。須明年九月方可見。友請解之。
先生曰。字勢休戚相關。知係至親。字形信義兼
有。知必盛德。字得傷殘之象。故斷有骨肉之變。
字得伏藏之體。所以是隱而避也。杭州附郭。乃
仁和錢塘。此字在仁錢之間。所以知仍在杭也。
立人傍。人字諧聲。從壬。戈字邊。戈字象形類。戊。
明年九月是壬戌。故斷相見在此時也。友謝而
歸。迨乙巳春。與是友遇。備言神驗。果仍在杭。兄
弟悔改訟解後。九月間復自歸也。

女

張先生書女字問婚事。問姓曰張。斷曰。張姓清
河屬水。女字得水爲汝字。正乃汝之婚姻也。問
貌。先生曰。子日占得女字。爲好。女加立字成妾
字。女乃婢字。少卑字。此人爲妾可立。卽居婢亦
不卑。且必沉嘿寡言。能治內政。公喜而未信。事
諧。復來顧曰。言無不驗。此女原買爲婢。今見其
沉重賢能。將立爲妾也。請問何以知其寡言。先

生曰。女字乃如夫人如字。不露口耳。是以知之。

七

一友書七字問子目疾。先生曰。目已損其半。其一將愈也。友駭然曰。犬子果壞一目何以知之。先生曰。目者北方水也。七字存北字之半。故知目損其一。又問何以知一目將愈。先生曰。七乃皂字去其白。皂白已分。故知其將愈也。

硯

庚子冬卜五陳公書硯字問基業。先生曰。破字

邊完字尾。先破復完。又問妻子。先生曰。惟此二者難言。石乃辰斷之象。夫人辰命有損。見是兒缺之形。子亦有傷。公不介意。公僅一子。儀表不凡。辛丑歲忽物故。夫人治柩還楚。悲慟過當。踰年亦卒。

聿

泰州一友書聿字問科考等第。占曰。此字當考二等前列。案發果如其言。其友復來請申其說。曰。此字書字無尾。筆字無首。書筆不全。不能一

等可知。聿字乃肆字之半。所以斷在二等。聿字第二畫長。所以定其前列。

鳥

一人指飛過之鳥。曰鳥字。問家中吉凶。先生曰。尊夫人病。其人駭曰。敝室原有恙。不識近日何如。故問先生。曰。重矣。當速歸。問大命妨乎。先生曰。恐難保。不日卽有信至。越明日。訃音至。問所斷之理。先生曰。鳥者禽屬也。禽乃內人。凶三字。故知其妻病危。篤鳥字乃鳴無口。病難生矣。飛

過之鳥音必速。

行

方樓岡先生問一來人。以兩指在膝間。虛書行字。先生曰。來人必兄弟。行非二卽三。時太翁先生同在座。駭問曰。何以知之。先生曰。兩指在膝間。寫字乃膝前手足之象也。寫字未曾及第四指。所以斷在二三也。公曰。奇。果係問三舍弟歸期。先生曰。行字乃吾已出衙之象。今當在途間。未幾如斷。

錢姓代親占訟於易內指得坤卦先生曰此事
從家起禍自外來幸有友消釋無大害矣友曰
神哉同胞兄弟因小事夜爭地方銜之以弑兄
妄報官訟今半載矣茲托一貴人求釋敬占請
問內外之理何居先生曰六斷之象在門字之
內·在非字之外·故從門內起事·而是非自外來
也·又如朋解之象·所以有人救解·六斷用于罪
字兩傍·所以知己脫其罪矣·數日後事息·

汪姓住蕪陰·自善拆字·試後求占·執筆獨點一
點·問曰·吾一等一名乎·先生曰·一等可期·不能
前列·友曰·點乃文字之首·豈得不前列乎·不服
曰·請案後言·案出果一等末·復造曰·子何解也·
先生曰·君知一點爲文字之首·不知一點居等
字之末耳·

馮

先生過京口·有舊交于姓·以訟事在鎮江候所

親不至。乞占。隨于方書中指得瀉字。斷曰：人因中途有阻。今已到。問幾時。曰：刻下。茶未熟。人果至。因路染霍亂來遲。喜謝曰：願聞字中理。曰：瀉頭如門字。形如馬。三點水借作鎮江。江字用馬星已到江門間。所以知其到之速也。字中有且字。故知中途有阻。友深服。

此

鹽道朱公曰：吾弟返都行時有微恙。途中安否。乞占之。隨書此字。斷曰：此字占兄弟。不吉之數。

也。此字類比字。比肩者。兄弟也。比傍多一直。又止字引頭。乃比肩之數止矣。况字形如死。豈尚生乎。又問曰：能抵家否。曰：此字與北字相去不遠。縱不抵家。近矣。旬日報至。公弟卒于河西務。

葉

李晝公書葉字占病。曰：世字在草木之中。棄世矣。恐非吉兆。字有棄字形。藥不成藥之象。病恐誤于藥而成棄也。不數日訃至。其弟玉匙場後感寒。悞服補劑殞。

已

楊姓者。偕友北遊。舟抵邗關。偶鼻衄不止。友書已字問先生曰。是凶數也。難過明日。友曰。鼻衄遽殞命乎。未信而去。次日來。昨歸舟鼻流已止。不期夜半血湧而逝。厥理安在。曰。已字加一夕。則死字也。故斷難過明日。

甲

真定周先生諱根部。遊姑蘇。書甲字問生平事。曰。進士周曰。何以見。曰。甲乃墨字之首。豈非高

舉者乎。公笑曰。然矣。知發自某科。曰。字象半成于庚。全得于丑。必是庚子辛丑兩科。公歎服。

西

壬寅冬。周恕庵先生見招。座間有書西字者。問作何事業。先生曰。字迹軒昂而有神采。自然榮貴高第者。字有兩字勢。自應兩榜無疑。字乃酉字頭。酉科應獲鄉薦。但西字屬金。從秋用。何得春時登榜耶。恕庵曰。神哉。此敝同年鄭晦中也。果丁酉鄉薦。已亥秋捷。南宮列庶常。無春榜之

言奇驗矣。

元

聶善克被王姓見控。求和弗允。書元字。斷曰。官訟欲和不允。後反勝矣。逢七遇八。卽結。子當高枕。十七日讞。原控人醉觸讞者怒。朴逐之。聶大喜歸。問字理。曰。元字加官字頭爲完。故畢竟見官始完也。字如允字不成。故欲和不允。王姓見元字爲玩。彼姓王。故我反勝也。字乃六頭九足。所以知逢七遇八。訟結在六九之間。聶深服。

參拾 陸拾

王友家人婦。晨出市物未還。指冊中參拾二字。乞占。斷曰。此人走矣。當速追尋。又開冊指陸拾二字。問方向。斷曰。太平。遣人追。果得。王請其故。曰。參拾爲大三十。大三十合成奔字。故知其走也。陸拾爲大六十。大六十三字。乃太平二字也。

二
知其地在

示

張書示字。問一官何日履任。斷曰。邑令耳。恐以

艱阻客驚曰果吳令何以知之曰示乃二小也
縣脚有二小丁字身恐以憂阻後皆驗

喜 以下俱礫公筆記

甲申礫公被厄于秣陵江右族子來詢時公姬
人方有孕公令族子書一字卜事之吉凶書喜
字公曰幸哉廿日以前事得脫矣族子曰井前
吉耶公曰否周解圍耳井之後當生一女以男
爲一丁女一口也後井之前事解井之後生一
女

戲

一友爲訟書戲字問礫公公曰事起于墳墓耶
以有丘字在下初大足慮以字是慮字頭然戈
雖盛虛矣問必到官否曰到雖戲亦必扮出始
下場耳俱驗

白

海寇圍閩省退已三日白幕忽滿山時

王師在泉南而寇去又未遠衆殊惶惑撫軍命何

司理棟書白字來視礫公曰大兵也以有兵

字形且自泉而至。非大兵而何。復問曰：何日入城？曰：字首一人，是八字之半，四也。又早字之首，初與十俱過，當是廿四日早也。已而報至，果大兵自泉至。廿七日，襄璞方伯從城下往迎。公城上呼之曰：必明早。襄璞笑曰：公仙人耶？未必鑿鑿如是。日暮，襄璞歸曰：主兵者約以明早入城。公數之驗如此。

六

同學周君諱方，以六字視礫公。公曰：何事？曰：吾

不言其事。君善測試，以臆言之。公曰：此大事，今紛裂矣。以字有大字形，而三分之也。此衆人事，後乃一人擔之。以人字在三處，中一畫任之也。此事主在上者，頗爲下，而下亦能得之于上。柰中有一人爲梗，其人頗有力，事當不成也。上乾下坤，天地不交，否矣。周日異哉。邑公以田贍諸貧士，貧士紛爭，事遂變。予欲一人任，邑公亦頗相爲，而邑紳又從中擾之，乃復中止。公曰：不第此。君有弟耶？曰：一弟。公曰：不生矣。以字之下左

爲兄右弟今字之右六字下一人出格外君弟不永矣周笑且怒曰誕哉未半月遇周于途白衣冠曰君以一字殺我弟弟數日前暴疾卒

住

程習之隨史蒼航主政在都門急欲歸史曰子門下士閩中史君胤庚應筮仕司理若得南當托之與俱程書住字問公曰明當選期再益一缺則閩中史君可得選今日報一缺至可卽出叙否予曰必出叙史公必選字形似任已着點

也程曰得何缺公曰吾不習幾缺安能定但以爾意何缺佳程曰紹興佳公曰卽紹興矣程曰何以知公曰吾故不習何缺但君言紹興佳故定之以字是缺佳耳是晚出敘明午得紹興衆共神之

筆

建寧賊王奇據城大兵至未遽克礫公在紹武城上衆共企捷音何司理書筆字問礫公時已廿三日公曰昨廿日已破建矣字竹頭作草

書似井聿爲建破象。後知建寧果克于井日。

九

席間有以九字問孕婦者。礫公曰。君尚未子耶。今當產不凡子。以字似兄不成。故知前之無子。九陽數。故當得男。似凡字而非凡。故知不凡。公又問其人曰。孕者是小星耶。應曰。然。曰。何以知。曰。字似元而非元。故知非元配也。以九添室中。似宀字。外則奸。內爲宀。須防室中不測。其人曰。異哉。僕薄資財。室中亦多妾媵。此孕者婢子也。


羣妾妒之。百計墮其胎。柰何。卒得保全。否。曰。完字之尾。庸何傷。其人後果生子。

字觸

卷之二終

字解

三



聖